



Комисија за спољну трговину и царине

Komisija za vanjsku trgovinu i carine
Povjerenstvo za vanjsku trgovinu i carine

Broj: 01/3-50-3-3-6/20
Sarajevo, 15. 12. 2020.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO:		16-02-2021	
Organizaciona jedinica	Klasifikaciona oznaka	Redni broj	Broj priloga

Z A B I L J E Š K A

s radnog sastanka Komisije za vanjsku trgovinu i carine Predstavničkog doma PSBiH, održanog 15. decembra 2020. u Glavnom uredu UIOBiH

Komisija za vanjsku trgovinu i carine Predstavničkog doma Parlamentarne skupštine BiH (u daljnjem tekstu: Komisija) na 6. sjednici, održanoj 14. 9. 2020, jednoglasno je usvojila sljedeći

Z a k l j u č a k

1. Komisija za vanjsku trgovinu i carine Predstavničkog doma Parlamentarne skupštine BiH organizirat će sastanak s menadžmentom Uprave za indirektno oporezivanje BiH o temama vanjskotrgovinske razmjene, borbe protiv korupcije i problema u funkcioniranju UIOBiH.
2. Od Uprave za indirektno oporezivanje BiH očekuje se da u što kraćem roku dostavi Komisiji za vanjsku trgovinu i carine Predstavničkog doma Parlamentarne skupštine BiH kraću pisanu informaciju o vanjskotrgovinskoj razmjeni u 2020. za prvih šest mjeseci, borbe protiv korupcije i problema u funkcioniranju UIOBiH, koja bi bila osnova za razgovor na sastanku.

Nakon dobivene informacije od UIO o traženim temama, s rukovodstvom UIO u Glavnom uredu u Banjoj Luci dogovoren je radni sastanak za 15. 12. 2020. u 14 sati.

Sastanku su prisustvovali: Dragan Bogdanić, predsjedavajući Komisije, Mijo Matanović, prvi zamjenik predsjedavajućeg Komisije, Edin Mušić, drugi zamjenik predsjedavajućeg Komisije, te članovi Komisije: Šemsudin Mehmedović, Zukan Helez i Mirko Šarović.

Sastanku su prisustvovali i: Mirjana Crnjak, sekretarka Komisije, i Enver Bogučanin iz Odjela za informiranje Sektora za odnose s javnošću u Sekretarijatu PSBiH.

Opravdano su odsustvovali: Nenad Stevandić, Enver Bijedić i Damir Arnaut.

Iz Glavnog ureda UIO Banja Luka sastanku su prisustvovali: Miro Džakula, direktor Uprave, Rosa Janković, šefica Kabineta direktora, Elvir Muminović, pomoćnik direktora Sektora za poslovne usluge, Vladimir Dragičević, pomoćnik direktora Sektora za carine, Muharem Mašinović, pomoćnik direktora Sektora za poreze, Danijela Jozić, pomoćnica direktora Sektora za provođenje propisa, Svjetlana Perković, pomoćnica direktora Sektora za

informacione tehnologije, Munevera Dedić, načelnica Odjeljenja za internu reviziju, Ratko Kovačević, načelnik Odjeljenja za komunikacije i međunarodnu saradnju, Azra Dedić, načelnica Odjeljenja za pravne poslove, i Jelena Rastoka, stručna savjetnica za pravne poslove u Kabinetu direktora Uprave.

Sastanak je počeo u 14 sati

Direktor UIO Miro Džakula otvorio je sastanak, pozdravio prisutne u ime svih zaposlenih i poželio dobrodošlicu članovima Komisije za vanjsku trgovinu i carine, te u uvodnom izlaganju informirao članove Komisije o naplati prihoda, navodeći da su bruto prihodi u periodu januar - novembar 2020. godine manji za 9,55% u odnosu na isti period 2019. godine, dok je pad prihoda u periodu januar - juni 2020. godine bio 9,86% u odnosu na isti period prošle godine.

U vezi s naplatom prihoda pojasnio je da za period januar - novembar 2020. godine bruto prihodi iznose 6 milijardi i 598 miliona KM, a neto prihodi 5 milijardi i 422 miliona KM, te da je COVID-19 uticao na drastičan pad prihoda u 3. 4. i 5. mjesecu, uz napomenu da je pad prihoda znatno manji u odnosu na region.

Također je naglasio da je UIO ključna institucija za fiskalnu stabilnost države i svih nivoa vlasti u Bosni i Hercegovini, te da se kao rukovodilac zalaže za profesionalno i maksimalno odgovorno postupanje i transparentan rad, kao i da Uprava ulaže dodatne napore kako bi se održala fiskalna stabilnost države.

U pogledu podataka koji se odnose na vanjskotrgovinsku razmjenu, direktor je naveo da su podaci o izvozu i uvozu za period januar - novembar mnogo povoljniji od podataka za period januar - juni iz informacije koju je Uprava dostavila Komisiji za vanjsku trgovinu i carine, te da u odnosu na prošlu godinu pad uvoza iznosi 14,38%, a pad izvoza 10,58%.

U dijelu izlaganja o izgradnji objekata upoznao je prisutne da bi izgradnja graničnog prijelaza Svilaj trebala biti završena najkasnije do kraja sljedeće godine, a graničnog prijelaza Bratunac u 4. mjesecu, nakon čega je informirao i o aktivnostima koje se odnose na rekonstrukciju objekta Regionalnog centra Tuzla i izgradnju Centralnog arhiva u Mostaru.

Kada je riječ o kadrovskim pitanjima, direktor je naveo da je u UIO trenutno 2329 zaposlenih na neodređeno vrijeme i 114 zaposlenih na određeno vrijeme, što je znatno manje od broja predviđenog Pravilnikom o unutrašnjoj organizaciji u UIO.

Predsjedavajući Komisije Dragan Bogdanić zahvalio se direktoru Uprave na uvodnom izlaganju, te podsjetio na zaključak Komisije koji se odnosi na organiziranje ovog sastanka o temi vanjskotrgovinske razmjene, borbe protiv korupcije i problema u funkcioniranju UIO, naglasivši da je na određena pitanja već dobio odgovore, ali da je zainteresiran i za stanje s visokotarifnom robom.

Mirko Šarović naveo je da je zbog poslova koje je obavljao u prethodnom periodu upoznat s problematikom s kojom se UIO susreće u svom radu, te čestitao direktoru na rukovođenju institucijom, posebno zbog činjenice da Uprava više nije na naslovnica zbog različitih afera. Također je naglasio da Uprava mora pratiti izmjene evropskog zakonodavstva i evropske

standarde u ovoj oblasti, te ukazao na značaj elektronskog potpisa. Osim pitanja koja se tiču opremljenosti Uprave, zaposlenih i materijalnih sredstava, istakao je da u narednom periodu treba raditi na tome da Uprava postane još efikasnija i omogućiti privrednicima nesmetan transport robe preko granice sa što manjim troškovima.

Šemsudin Mehmedović izrazio je nezadovoljstvo sadržajem dostavljene informacije zato što iz nje nije moguće vidjeti strukturu robe u izvozu/uvozu, zbog čega je zatražio detaljnije podatke o prekograničnom prometu robe za 2019. i 2020. godinu. Također je naveo da, imajući u vidu situaciju prouzrokovanu pandemijom koronavirusa, smatra da je pad uvoza/izvoza očekivana posljedica, te naglasio da ga određene oblasti posebno zanimaju, i to: uvoz/izvoz nafte i naftnih derivata, uvoz kafe, plaćanje poreza na dodatu vrijednost na PCR testove koji se rade po zahtjevu pacijenta, postojanje odgovornosti u slučaju Fabrike cijevi „Unis“, izvoz plina iz Bosne i Hercegovine u Republiku Srbiju, te zaštita prava zaposlenih u doba pandemije, prije svega carinskih službenika.

Zukan Helez postavio je pitanja koja se odnose na akciju „Pandora“, postojanje političkih pritisaka u smislu korupcije i kriminala, poresku evaziju, kao i pitanje donošenja zakona s ciljem olakšavanja rada Uprave koju smatra najstabilnijom državnom institucijom.

Edin Mušić istakao je izuzetno odgovornu ulogu i značaj Uprave za fiskalnu stabilnost države, te postavio pitanje o uvozu/izvozu repromaterijala za razne industrijske grane.

Mijo Matanović iskazao je posebnu zainteresiranost za izgradnju graničnog prijelaza Svilaj i njegovu kategorizaciju, kao i mogućnost privremenog otvaranja tog graničnog prijelaza.

Nakon postavljenih pitanja članova Komisije, direktor je ponovio da je izgradnja graničnog prijelaza Svilaj u toku, te istakao da Evropska komisija želi da taj prijelaz bude otvoren do 28. 2. 2021, ali da ne vjeruje da je to moguće, prije svega, zbog vremena koje je potrebno za stabilizaciju zemljišta, te da je, prema njegovom mišljenju, realno očekivati da on bude završen do kraja augusta naredne godine, dok je u pogledu kategorizacije prijelaza naglasio da to pitanje nije u nadležnosti Uprave.

U vezi s pitanjem o akciji „Pandora“ i političkim pritiscima, rekao je da navedena akcija nije stvar Uprave, već postupanja nadležnih institucija, a da političke pritiske ne dozvoljava i da Upravu ne čini samo menadžment već svi zaposleni, ističući da UIO ima veliki broj zaposlenih s visokom stručnom spremom i doktora nauka, kao i eksperata koji su cijenjeni ne samo u Bosni i Hercegovini nego i u inozemstvu, te je izrazio zabrinutost zbog pojedinih medijskih hajki iz političkih i drugih ciljeva, jer se u takvim slučajevima ne uzimaju u obzir činjenice, a one se negativno odražavaju na ugled institucije i njenih zaposlenih.

Naglasio je da će Uprava dostaviti odgovore na konkretna pitanja koja se odnose na strukturu uvoza/izvoza, Fabriku cijevi „Unis“, uvoz plina i naglasio da je rad Uprave u potpunosti transparentan i da su sve informacije uvijek dostupne.

U daljnjem toku sastanka rukovodioci osnovnih organizacionih jedinica odgovorili su na postavljena pitanja, te informirali članove Komisije o rezultatima rada i problemima s kojima se susreću.

Nakon pitanja svih članova Komisije i izlaganja direktora Uprave i rukovodilaca osnovnih organizacionih jedinica, predsjedavajući Komisije Dragan Bogdanić zahvalio se svima na učešću, nakon čega je donesen sljedeći

ZAKLJUČAK

Zadužuje se Uprava za indirektno oporezivanje BiH da Komisiji za vanjsku trgovinu i carine Predstavničkog doma Parlamentarne skupštine BiH dostavi detaljnije informacije o svim pitanjima o kojima se raspravljalo na sastanku kako bi ih Komisija mogla analizirati i donijeti odgovarajuće zaključke.

Sastanak je završen u 16 sati.

Sekretarka Komisije
Mirjana Crnjak

Predsjedavajući Komisije
Dr. Dragan Bogdanić